

陶雲汀先生奏疏

奏摺卷二目錄

巡漕稿

巡城稿川  
東道稿附

安化陶澍

巡視南漕謝

恩摺子

恭報任事日期並江境水勢回空糧船各情形

摺子

恭報回空漕艘出江全竣並預籌新運各事宜

摺子

恭報南糧重運首幫渡江並籌畫催償各緣由

摺子

敬籌鎮江運河事宜摺子

恭報南漕重運掃數入瓜口摺子

恭報三進漕船全數渡江摺子

同江督漕督  
河督會奏

恭報漕船重運全數入山東境摺子

同漕督  
會奏

南漕差竣恭復

恩命摺子

參奏世襲侯爵指欠釀命請交部清算摺子

同滿

察院  
會奏

查出司坊積欠請交戶部核對追繳摺子

同滿  
察院

會奏附  
片一件

查辦土米積欠酌擬分任賠繳摺子

同滿察院會奏

補授川東道謝

恩摺子

履歷夾單附

巡視南漕謝

恩摺子

奏爲叩謝

天恩恭請

聖訓事本月二十四日奉

旨巡視淮安漕務著陶澍去欽此竊臣楚南下土由

嘉慶七年庶吉士散館授職編修十五年奉

命典試蜀中上年三月改補御史旋充會試同考官

十一月奉

命巡視中城本年四月蒙

恩擢授戶科給事中涓埃未報兢惕方深迺荷

洪施稠疊畀茲重任伏念淮揚爲糧艘滙遞之區巡

漕有催趨稽查之職安流利運籌畫攸關臣惟

有勉竭駑駘矢誠辦理以冀仰酬

高厚鴻慈於萬一所有微臣感激下忱謹繕摺叩謝

天恩恭請

訓示伏祈

皇上睿鑒謹

奏

嘉慶二十年九月二十六日

恭報任事日期並江境水勢回空糧船各情形  
摺子

奏爲恭報任事日期並江境水勢回空糧船各情  
形仰祈

聖鑒事竊臣於九月二十六日恭請

聖訓仰蒙

皇上誨示諄詳跪聆之下感悚莫名旋卽起程於十  
月三十日行抵清江浦維時漕臣李奕疇尙在  
黃林莊一帶督催尾幫河臣黎世序迎赴途次

跪請

聖安卽同臣赴河口一帶察看水勢及閘壩情形現  
在黃水漸消洪湖水勢尙旺暢出刷黃裏外河  
一律深通回空糧艘已渡黃河七十幫計船二  
千六百七十餘隻俱皆暢行無滯惟在後尙有  
八幫計船四百餘隻必須趕緊飛催俾得早歸  
早兌以速全漕臣謹於十一月初二日在清江  
拜印視事一面派員作速迎提後幫一面親自  
督趨前船遣赴瓜口俟回空將竣臣卽赴徒陽  
運河查辦挑工一應事宜惟有竭誠辦理斷不  
敢蹈因循積習以副我



皇上委用之至意所有臣任事日期並江省水勢回  
空船隻各情形理合恭摺具

奏再臣自出京後沿途麥苗均已茁發十月二十  
五日臣乍入江境宿遷地方適遇雪澤厚積一  
二寸不等次日仍陸續得雪豐年預兆百姓極  
爲歡忭合併附摺以

聞伏乞

皇上睿鑒謹

奏

嘉慶二十年十一月初二日拜發十一月二十

陸門子才人正名二  
五日奉到

殊批覽欽此

恭報回空漕艘出江全竣並預籌新運各事宜  
摺子

奏爲恭報回空漕艘出江全竣日期並預籌新運  
各事宜恭摺具

奏仰慰

聖懷事竊臣自十一月初二日抵清江拜印視事維

時回空漕艘甫經全入江南地界臣一面委千

總周丕福飛提江廣後船一面親押浙江尾幫  
日夜遄行業將到任並渡黃日期

奏蒙

聖鑒

臣

於初八日將浙江尾船僱入丹徒運口

因值潮落水枯該境下游猪婆灘一帶淺阻二

百餘艘當卽馳往相視督飭署鎮江府知府唐

先甲丹徒縣知縣李景嶧設法甬撈兼用天關

地牛挽曳撫

臣

張師誠亦卽委員一同催辦其

時江廣船在後

臣

恐稍延或致冰凌凍結敲鑿

費事則渡黃雖早亦屬徒然卽於十四日復馳

回揚州迎趲後船而連日西風天寒欲雪十七

日更甚湖冰凍結

臣

奔馳往來正深焦急因念

往時阻凍艱難萬狀俱在高郵邵伯一帶該處

向有露筋

神祠康熙四十六年曾蒙

御賜節媛芳躅四大字匾額舟航往來祈禱多著靈應

臣 卽日專弁竭誠致禱於十八日狂風頓息天

氣回暖湖水解凍各艘暢行而徒陽阻淺之船

亦因潮水驟長卽於是日盡行浮送出境二十

二日煞壩限五晝夜厚水罄盡現同撫臣張師

誠會勘興挑具

奏在案其江廣各船因天氣晴和弁丁歡欣踴躍  
不分晝夜絡繹挽行於十一月二十八日尾幫

趙出瓜口總計六省軍船共七十五幫爲數三十零三隻全行出江完竣伏查上年回空各船於開年正月初五日始掃數出江本年比較早至三十七日再查十八年十二月初十日空船全數出江本年比較亦早至十二日此皆仰賴聖主福庇潮已落而驟長冰甫結而忽開較之近年以來事機實爲順利臣現在恭錄近奉

上諭咨行各省糧道務須冬兌冬開復還舊制其高寶揚河一帶緯道每年遲至春間始行修理以致重運溯流而上無處使用犁緯臣已飛咨河

臣黎世序一體嚴飭廳員趕緊修理至兌漕米色本年南省豐稔收漕較易臣仍飛咨各處總以早兌早開爲主則旗丁無暇措索州縣無從和兌米色自更精潔而各省重運及時抵瓜臣得以趕緊督趨源源北上從此年速一年河漕兩利庶稍答我

皇上宵旰勤勞之至意所有各船出江完竣及預籌事宜理合恭摺

奏

聞伏祈

皇上睿鑒訓示謹

奏

嘉慶二十年十一月二十九日拜發十二月二

十四日奉到

硃批欣慰覽之欽此



恭報南糧重運首幫渡江並籌畫催償各緣由

摺子

附片一件

奏爲恭報南糧重運首幫渡江日期並籌畫催償各緣由仰懇

聖懷事竊照本年漕船回空較早新漕重運自應冬

兌冬開趕緊催行臣於空船掃數出江後卽會

同撫臣張師誠勘挑徒陽運河業於十二月十

七日竣工開壩合詞具

奏在案

臣

於開壩之先卽將鎮江首進重船派弁

押抵華家莊壩門十八日提出江口候風緣丹

徒江口北對瓜洲在金焦二山之間水深磯碛  
必得東南風然後糧艘用紅船引帶而過半月  
以來西北風勁十九日午刻倏轉東南風臣卽  
督押首幫船隻揚帆渡江駛入瓜口行走甚爲  
順利其在後各幫亦卽飭令跟接而來惟臣查  
本年重運係屬全漕船隻比上年多至一千三  
百有餘兼有搭解緩徵等項米石每船多載米  
二百餘石船多且重不特與上年減運時情形  
不同卽較之往昔全漕之年亦復加重必須預  
爲籌畫始能迅速運行查糧艘往時延緩之故

每由於脫空積壓而脫空之根雖有風阻水淺  
尤多由於兌糧捐勒彼此觀望或中途帶貨稽  
延臣已迭飭有漕各地方官弁務須隨收隨兌  
隨兌隨開並令於某日開兌某日開船某日行  
抵某處某日風色若何某地水勢若何一一按  
期稟報仍於中庭豎立風幟隨時識載遇有託  
故延挨無難查對明確立行叅處其米色過淮  
例須盤驗但臨期駁換雖嚴加創懲亦已耽延  
時日自不若嚴之於始臣已札飭各糧道認真  
核辦務期乾潔並嚴禁幫弁漁利漕委需索有

犯卽懲總期於漕有益俾得年速一年以仰副  
皇上厯注漕儲之至意所有重運首幫渡江日期暨  
預籌新漕各緣由理合專摺具

奏伏祈

皇上睿鑒訓示謹

奏

再江蘇一帶麥田望雪臣於二十日寅刻正繕  
摺間祥霽適集計厚一寸有餘同雲四布雪意  
方殷查本年漕船回空恰在河水未凍之前一  
日已掃數出江茲於徒陽運河甫竣之際卽值

順風放渡瑞雪應期此皆我

皇上誠求錫福暘雨依時故得事機順利民情懽怍  
足占豐年預兆爲此附片以

聞伏祈

皇上睿鑒謹

奏

嘉慶二十年十二月二十日拜發

嘉慶二十一年正月十三日奉到

硃批所辦尙妥知道了欽此又夾片奉到

硃批欣慰覽之欽此

敬籌鎮江運河事宜摺子

奏爲敬籌鎮江運河事宜以利漕行而垂久遠仰

祈

聖鑒事竊

臣奉

命巡漕刻刻以嚴切催儻爲要現在首進全幫盤驗  
在卽約可早上年十餘日惟因正月內雨少風  
多江潮陡落河道間有淺阻雖經設法掃撈各  
船相次跟渡江潮亦漸暢旺已可無虞淺滯但  
臣查江浙爲漕務最多之地而鎮江又爲江浙  
運道咽喉尤宜慎重未可以目前尙屬暢順卽

忘遠慮臣因籌催之際親歷該處湖閘始知前  
人立法原極周詳不可不亟爲修復請爲我

皇上陳之

一練湖宜濬治也查鎮江運河水無來源惟丹  
陽縣西有練湖一所古名曲阿後湖收納長  
驪諸山八十四汊之水滯蓄濟運與山東微  
山諸湖相似自康熙年間上練湖墾爲民田  
下練湖亦日見淤塞一望荒烟春夏漲發旣  
虞其潰堤秋冬水涸又無以濟運查河臣黎  
世序於鎮江府任內曾經捐建三閘但湖底

未深水難存蓄能灌田而不能濟運計下練湖周圍四十里若得挑濬使水有所瀦遇潮枯時湖水開放一寸運河即可增長一尺不特丹陽無慮併可以接濟丹徒之上矣

一甘露港宜挑深也鎮江口門寬祇數丈而自丹徒至常州一百六十里間皆藉此口納潮未免源少流長查江口稍下有甘露港亦係納潮之所其水從北固山前流經北水關入城出南水關長一千三百餘丈便民濟運由來已久近年淤墊不通江潮聞城中百姓因



汲飲維艱亦願捐挑若得官爲勸勵辦理是  
又添一納潮之所也於漕行自更利矣

一閘座宜整理也查丹陽有奔牛呂城等閘所  
以收練湖之下瀉丹徒有西門南門等閘所  
以防江潮之迴退而丹徒之橫越二閘尤爲  
旁納江潮要地近因石縫圻裂閘底漏水不  
能下板收蓄以致急迫時用氈絮貼且閘  
底低於河身內寬而外隘潮來旣不能暢入  
潮退且併底水撤去此因木商捐修利於簞  
筏之轉側而不知漕運已因之膠淺尤宜早

爲修整也

一積土宜起除也鎮江河道原係秦隋時鑿山而成岸偪崖高如頭道溝野狗墩猪婆灘諸處兩岸陡立各長四五百丈高二三十丈不等出土無路河底之掘挖日深則兩岸之傾側日甚兼之興挑例在隆冬手足痺瘝一遇雨雪滑跌尤多一夫所挑不過八撬比及山頂已傾灑過半大雨之後仍復衝洗入河此所以旋挑旋淤也爲今之計或將所挑之土運出大江傾棄或設法搬移至荷花塘及邵

伯湖西一帶填補堤埂緯道或卽就高處酌抽土巷數條俾得繞至山後出土總之舊土縱難盡除而新土則斷不可再加矣

以上數條皆係前人成法特以廢弛已久故運道日漸艱難臣溯查舊案無歲不有淺阻之事一值江湖陡落百餘里長河無從接濟兼之江湖挾沙而入每日計厚一錢以一年計之厚及尺餘從前猶有二十年一疏五年一挑之說近則五年一大挑一年一小挑而仍不免淺阻總緣人人苟目前之安而不爲遠計置成法不問

而徒恃夫挑工不知挑工及於河底而止而江潮之起落無常是收水之閘座宜先而引潮瀦水之港湖不可不講也臣爲籌復舊制以利漕行起見是否有當伏乞

皇上睿鑒謹

奏

嘉慶二十一年二月二十六日拜發三月二十日奉到

硃批另有旨欽此同日准 軍機處知會 貴巡漕條陳鎮江運河事宜一摺已奉

旨將原摺交兩江總督百齡查辦矣

三月二十三日准

兩江總督百 咨開三月二十一日承准

軍機大臣 字寄

兩江總督三等男百 嘉慶二十一年三月初

八日奉

上諭據陶澍奏鎮江運河間多淺阻宜濬治練湖甘露港等處以裕來源並修整閘座起除積土各條其言是否可行著百齡勘明核議具奏陶澍原摺並發給閱看欽此

恭報南漕重運掃數入瓜口摺子

奏爲恭報南漕重運全入瓜口及督押尾幫赴淮  
渡黃緣由仰祈

聖鑒事竊漕糧重運自上年十二月十九日經臣親

押首幫過江開行較早旋因雨雪久稀江潮枯  
落自鎮常至蘇松一帶節節淺滯其已抵京口

之船又因風阻不能如期渡江臣奔馳往來正

深焦急當卽乘坐小船親詣橫越各閘下板蓄

水並札丹徒縣知縣李景嶧製造鐵箕刮刷河

底較爾撈更爲得力復經督臣百齡派委揚州

同知許文綬金壇縣丞熊祖源揚州營遊擊尹國均等分駐河干按段籌催一面飭令地方府縣雇備剝船梭織輪送臣仍督率漕衛千總周丕福沈世城羅有上胡照廖文源從九品曲星等無分晝夜設法儻挽仰賴

聖主福庇自三月初旬以來甘膏渥霈各處河水長足船行順利四月十七日浙船渡竣遄過揚關臣卽馳抵儀徵黃泥港一帶親押江廣各船東下數日之間風利行駛絡繹入口統計六省糧船共九十二幫爲船四千四百九十二隻比上

年多船十九幫共多船一千三百六十九隻於  
四月二十八日全數挽入瓜口接連北上查嘉  
慶十九年係二月遇閏糧船於四月十三日全  
數入瓜本年比較早十五日再查二十年因緩  
徵減運亦於四月二十八日糧船全數入瓜比  
較日期僅堪相等而本年船隻較多比上年多  
載米一百數十萬石兼各船俱有搭運糧米即  
比往常全漕之年亦復加重合計行程尙屬有  
早無遲現在運河通暢可省起淺盤剝之累其  
丁舵例帶土物亦因水足得沾餘潤彌覺歡欣



踴躍行走奮迅至黃河壩口起落本無一定日

前微有頂滯略須起剝經督臣百齡河臣黎世

序嚴速料理頃探聞淮水漲發自四月初六以

後六日之間長水一丈三尺五寸湖水日增流

出刷黃足資浮送截至四月二十四日已渡黃

河船六十九幫計三千二百三十三隻比上年

此日多過船一千四百餘隻後船銜尾上闌行

走可期順利臣現押尾幫赴淮會同漕臣李奕

疇隨驗隨行趕緊渡黃入東不任稍有稽延以

冀全漕迅速仰副我

皇上宵旰厯勞之至意所有全漕入瓜及赴淮渡黃  
各情形理合專摺具

奏伏祈

皇上睿鑒再江省近來雨暘時若麥苗暢發臣沿途  
察看俱已吐穎結實詢問農民僉稱可望九分  
收成似此情形洵足仰慰

聖懷合併奏

聞謹

奏

嘉慶二十一年四月二十九日拜發五月二十

三日清江舟次奉到

硃批欣慰覽之欽此

恭報三進漕船全數渡黃摺子

同江督清督河督會奏

奏爲恭報三進漕船全數渡黃日期仰祈

聖鑒事竊照本年重運三進幫船於四月十五日二

進尾幫渡黃之後卽跟接僨渡臣等因三進多

係江廣重船河口自桃汛以來黃水時形內漾

深恐日久漸形淺滯計惟趕緊提催以期早日

全渡臣百齡分派文武各員弁節節僨行不容

片刻停滯臣李奕疇勒限提催各幫到淮加緊

盤驗督令銜尾挽渡臣陶澍在瓜洲提催幫船

全進江口督押上行臣黎世序在河口一帶籌

催並添築挑束各壩逼刷停沙緩托閘門溜勢以資浮送四月下旬正因黃水內漾日久河泓淤淺幫船起剝挽渡將有停滯之虞臣百齡亦自省趕至清江會商設法提挽適洪湖水勢連日陸續增長一尺九寸黃水漸消清水暢出河口卽見刷深江廣極重船隻略爲起剝卽行挽渡臣等督飭幫弁催漕各員趁水勢通暢更爲加緊僱行於五月二十五日三進船四十一幫全行渡黃完竣查上年漕船八十一幫於六月初六日全行渡黃本年漕船一百零一幫並有

硃批

搭運米石比上年多船二十幫多載米一百四十餘萬石卽比往常全漕之年亦多米五十餘萬石今渡黃之期比上年較早十一日比十九年有閏之年早至二十一日臣等前因本年船隻米數旣重且多而黃水來源又較往年夏初倍形旺盛深恐阻遏清水出路淺滯漕船上煩宸厪正在焦急籌慮而安省正陽關淮水於旬日之間驟長一丈四尺五寸幸入恩洪湖清水大爲增長黃河水勢適於是時頓形消落讓出清水河口刷滌見深似此淮水於未應見長之時忽然

陸運河生勢助維二  
長發黃水於未易見消之際旋卽見消渡黃船  
隻銜尾暢行曾無一日停滯實爲意計所不到  
人力所不能皆我

皇上誠格

天神川源助順不但

臣

等及在事各官目覩身親同

深感惕卽幫丁夫役亦無不歡欣感頌萬口同

聲現在邳宿運河東境湖水充足

臣

黎世序已

咨會東河照例加啟湖閘板水接濟三進重船

並飭徐州道運河廳將邳宿境內各處水口全

行啟放以資添助據報五月十九日止已挽出

江境船八十一幫僅餘在境船二十幫臣李奕  
疇臣陶澍現卽督押尾幫趕赴邳宿運河可期  
計日出境早達

天庾仰慰

聖懷再本年船多載重臣等深慮不能趕副限期是

以派委文武員弁逐節籌催前此春雨久稀多有淤淺迨後水發各閘壩溜逼異常該員等晝夜催僦緯挽不辭勞瘁是以漕船雖多而行走反速於往年現在仍飭令加緊僦挽俟全幫過出江境再行細核各就臣等所派人員內擇其



陸雲門先生奏對卷二  
始終奮勉尤爲出力者另行

奏請

恩施量加鼓勵合併陳明所有三進漕船全數渡黃  
日期謹合詞恭摺由驛奏

聞伏乞

皇上睿鑒謹

奏

嘉慶二十一年五月二十七日拜發六月初八  
日奉到

硃批另有旨欽此又於滙入洪湖清水句旁奉

硃批幸慰欽此同日奉

上諭百齡等奏三進幫船全數渡黃一摺本年清水於未應見長之時忽然長發暢出清口立將河口刷深江廣重運船隻得以迅渡事機實爲順利但清水當四五月之交已驟長一尺九寸此後大雨時行仍必續加漲發倘清水過於旺盛堤堰工程在在喫重更不可不加倍小心從來

天道敬慎則致福滿盈則召咎先憂後樂其理信而有徵該督等當思未雨綢繆慎益加慎本日具奏請撥銀兩以爲添備大汛之用江省河工年來甫

有起色萬不可稍存大意務將各處堤堰留心相  
度刻刻隄防應培者培應補者補總期一律堅實  
穩固保守萬全永慶安瀾爲要將此諭令知之欽  
此



四庫全書卷之二  
三  
緯道多有淹沒其河清匯澤利運等閘面有漫  
水一二尺不等無從安設關座拉挽維艱臣等  
當卽分派幹員會同運委各弁察看緩急情形  
加意保護設法籌催仰沐

皇上洪福上閘各幫雖稍有停待船隻並無損壞迨  
六月十六日以後天氣晴霽水勢漸見消動臣

等親督弁丁節節加關加緯無分晝夜嚴速提  
催不任稍有觀望兖州鎮總兵臣劉榮慶先經

移駐台莊率同將備弁兵在八閘上下來往饋  
催彈壓茲於六月二十一日將三進之湖南三

尾幫催入東境查上年重運八十一幫亦係六月二十一日入東本年計多二十幫共多船一千四百餘隻時日仍復相同比較十九年七月初十日入東之期是年有閏二月計早四十九日再查東境之彭口十字河爲各處山水匯注之所每有噴沙淤墊之慮東漕臣王耀辰現在沿闡迎提臣李奕疇於拜摺後卽馳詣十字河會同臣王耀辰督飭饋行一俟各幫全過該處卽赴濟寧臨清一帶嚴押聯絡出東務期速益求速以冀上紓

宸厪臣劉榮慶先馳往臨清聞外督同員弁催押在  
前各幫跟接北上臣陶澍南漕差竣卽由台莊  
陸路起程恭復

恩命所有三進尾幫全入東境日期臣等謹恭摺會  
奏伏乞

皇上睿鑒謹

奏

嘉慶二十一年六月二十一日拜發閏六月初  
二日奉

硃批知道了欽此

南漕差竣恭復

恩命摺子

奏爲恭復

恩命事竊臣奉

命巡視淮安漕務業將重運首二三進幫船催償入  
瓜過淮渡黃出境各緣由前後

奏蒙

聖鑒在案

臣

於六月二十一日將糧艘尾幫全數催

出江南黃林莊境交巡視東漕

臣

王耀辰接催

臣卽由韓莊登陸北上茲於閏六月初十日至



京理合泥首

宮門叩謝

天恩恭復

恩命伏祈

皇上睿鑒謹

奏

嘉慶二十一年閏六月十一日

叅奏世襲侯爵指欠釀命請交部清算摺子

同滿察院會奏

奏爲特叅指欠釀命審明奉

旨交城清算屢傳抗不赴案之世襲三等侯施彬請  
旨飭旗催傳以清積牘而肅功令事竊臣等奉

命巡城惟以清釐案牘隨到隨結用期仰副

聖主整飭城務之至意詎有恃爵藐抗之世襲靖海

侯施彬者前因該欠烟錢鋪之譚林山錢一千

餘串係鋪夥范作棟經手屢討拒不見面范作

棟無可奈何情急服毒身死經刑部審明范作

棟輕生係因施彬負累所致

奏交兵部議處所欠錢文行旗飭追因數目不符  
交東城飭令兩造清算於嘉慶二十二年十二  
月二十日奉

旨依議欽此曾經前任巡城御史飭司催傳施彬竟  
置之不理其家人張姓聲稱伊主身係侯爵不  
能錄送口供亦不能遣家人赴司算賬本城無  
憑查辦曾於上年十二月本年三月兩次移旗  
飭催並無隻字回覆五月內又經送部行催仍  
抗違如故臣等於十月內到任後疊據譚林山

以負累衆多死生無路范作棟骸骨不能搬歸  
寡母無貲養活施侯爵高祿厚家道充足又有  
福建祖遺地租不下千金每年八九月由糖船  
寄京人所共知並非無力一味仗勢強橫等情  
具控到城復經臣等移文該旗催傳依然置若  
罔聞似此措欠釀命之案倚恃侯爵藐抗經年  
案懸莫結不特譚林山等生死難甘且係奉

旨交辦之件竟敢任意玩延實屬目無

功令相應據實叅

奏請

旨交鑲黃旗漢軍都統轉飭該佐領速取施彬口供  
令伊家人赴司清算以便行旗著追交部給領  
庶

功令肅而積案不致久懸矣爲此具

奏伏祈

皇上睿鑒謹

奏

嘉慶二十三年十一月二十八日具奏本日奉  
旨施彬著解任交刑部將伊所欠譚林山錢賬質算  
明確勒令迅速歸還交完給領奏明開復如仍抗

延不楚卽叅奏革職欽此

十二月刑部奏施彬所欠譚林山錢賬現已全

完給領照例

開復完案

查出司坊積欠請交戶部核對追繳摺子

附片一件同滿察院會奏

奏爲查出司坊前任積欠請

旨飭交戶部核對以憑追繳而重錢糧事竊查五城  
司坊領糶各倉成色米豆糶賣錢文係由該指  
揮具文批差解部戶部據文付庫查收後出具  
實收本員自行收存向不交給後任是以錢文  
雖批解有案而已否上庫不特本城無憑查核  
卽接任之員亦無交代冊籍可查此歷來辦理  
之情形也本年十一月初四日經戶部都察院

會議五城司坊官承賣糧石存留批解及所領  
實收均於新舊交卸時辦列交代冊籍以備查  
考奉

旨依議欽此欽遵經都察院轉飭在案臣等到任後

卽飭司坊官等嗣後遵照新例辦理務須慎重  
錢糧卽從前各任未列交代之項如查有轆轤  
未清之處亦應據實報明以憑查辦隨接都察  
院劄催上年報銷各冊復經臣等轉飭去後茲  
據東城指揮徐珍稟稱奉牌遵飭承辦糧吏馬  
文驤詳細造冊現據開出二十一年歲底前任



尚有舊管存倉土米一萬五千七百六十一石  
四斗四升七合五勺黑豆二千七百十七石二  
斗五升三合一款查卑司於本年五月接任時  
據已故前任指揮朱衍昶之姪朱咸林帶同該  
糧吏開出朱衍昶任內應交承糶土米共大錢  
九百十六千八百八十二文此外並未開載另  
有存倉米石當將朱衍昶任內領米印簿核算  
錢文大數相符卑司卽飭糧吏按數投批解部  
現在飭辦二十二年報銷忽有此項舊存並無  
著落查朱衍昶上年所造二十一年報銷底冊

亦並無此項存倉米石詰訊該吏語多含混恐  
有情弊合將該吏所開原單呈閱稟請查辦前  
來查此項承賣米豆爲數既多自非一任一年  
之事該司衙門所存上年前任報銷底冊旣未  
載明舊管尙有積欠無從核對恐數目尙有未  
符並恐該書吏等有侵挪情弊相應抄錄該吏  
所開前任積欠清單請

旨交戶部速卽逐細查明所領米石等項係何年何  
員承領是否數目相符以便著落追繳庶不致  
日久益形軃轉而錢糧可期速清矣至該書吏

馬文驤經手多年冊籍皆其所造現交該司看  
押俟戶部查明如有弊混應行質訊之處卽送  
刑部究辦爲此具

奏伏乞

皇上睿鑒謹

奏

夾片一件

再東城副指揮杜培於上年冬間到任現據開  
造嘉慶二十二年報銷清冊其舊管一項內載  
二十一年分存大錢四千六百一十八文

係憑前任繆其泰任內舊冊所書但現在查出前任正指揮衙門積欠甚多則該副指揮衙門前任各員內積欠恐亦不止此數應一併請旨交戶部查明歷任各副指揮任內有無積欠多少是否數目相符以便著追歸款爲此附片

奏

聞請

旨

嘉慶二十三年十二月初八日具奏本日奉

硃批戶部查核具奏又夾片一件奉

殊批戶部知道欽此

查辦土米積欠酌擬分任賠繳摺子

同滿察院會奏

奏爲遵

旨查辦土米積欠酌擬分任賠繳以清

帑項事竊

臣

等於上年冬底牌飭司坊辦理二十

二年報銷清冊據指揮徐珍查出前任尙有積欠土米一萬五千七百餘石黑豆二千七百餘石並無著落稟請查辦

臣

等以正廠既有積欠恐副廠亦有積欠當經奏明奉

旨交部查核旋據戶部奏稱正廠舊存數目核與前任指揮朱衍昶造送二十二年銷冊相符又副

指揮繆其泰二十一年所造奏銷冊內亦有應存土米七千二百餘石存豆一千三百餘石是否存倉有無挪掩情弊應令都察院轉飭各城御史自行查明奏辦奉

旨依議欽此臣等查存剩米石自應以每年報部印冊爲憑惟現任指揮徐珍副指揮杜培到任未久均在前任已辦報銷印冊之後在未經奉

旨設立交代冊籍之前此項舊管米豆俱未經手其爲何年何員承領積欠無憑查核當卽行文戶部調取歷任報部清冊茲於開印後據戶部移

送各冊前來正副兩廠均自嘉慶六年報銷五  
年起其五年以前印冊據稱因大雨黴爛等語  
臣等飭同司坊按照現存各冊連日核對計正  
廠米豆數目其積欠在嘉慶五年以後有任可  
歸者十之三四在五年以前無冊可查者十之  
六七副廠數目均係五年以前所積五年以後  
尙無續欠惟舊管久已無存每年印冊仍復虛  
存名目臣等細加體訪緣土米土豆本係各倉  
氣頭馱底掃土所積不堪貯放之項發交各廠  
隨時變價並無定限賤糶則不足交官久貯則



日加徵變從前既不由城核繳又無交代冊籍  
辦理原未周密數十年來陳陳相因遞形虧缺  
挪新掩舊誠不能保其無弊惟是事閱多年官  
更更換存亡不一兼之印冊不全無憑澈究展  
轉行查徒滋膠轕伏查各省無著款項原有按  
任攤賠之例現在南城土米虧欠業經奉  
旨准其按任分賠並將該員等應得處分

加恩寬免欽此欽遵在案東城正副兩廠事同一例  
應請照依辦理除自嘉慶五年後正廠各員有  
任可歸者應歸各員攤繳其五年以前無冊可

查者亦應著落攤賠至副廠無著各款雖在嘉慶五年以前既經接任各員出冊報部卽應在該員等名下分賠歸款謹另繕清單恭呈

御覽請

旨敕下戶部按照例限行文追繳如逾限不完卽行嚴叅治罪至現任正副指揮到任在後其二十三年以後新收款項應歸該員等報銷現在陸續批解勿任逾延俟照例另咨戶部核銷外臣等惟有飭令恪遵去冬新定章程設立冊籍年清年款將來交代後任不致稍有含混所有遵

旨查辦緣由理合專摺覆

奏是否有當伏祈

皇上睿鑒謹

奏

嘉慶二十四年正月二十九日具奏本日奉

上諭御史文溥等奏查辦土米土豆積欠請分任賠  
繳一摺南城土米土豆虧缺前經降旨准其按任  
分賠並將該副指揮等應得處分加恩寬免茲據  
文溥等查明東城正廠米豆數目其積欠在嘉慶  
五年以後有任可歸者十之三四在五年以前無

冊可查者十之六七副廠米豆數目均係五年以前所積舊管久已無存請一併著落分賠所有該城未解正廠土米制錢四千四百三十九千零土豆銀五百四兩零卽責令前任正指揮陳理盛李宗聞謝天樛朱衍昶四員照數分賠該城未解副廠土米制錢二千三百八千零土豆銀一百七十一兩零卽責令前任副指揮張瑞雲劉寶符喬集祥蕭炤張希忠周連繆其泰七員照數分賠仍著該部按照例限行文著追如逾限不交嚴叅治罪應得處分亦著加恩寬免其二十三年以後新收

米豆價值卽飭現任正副指揮按限批解勿任再有遲逾欽此

東城正廠積欠米豆數目

查嘉慶五年以前應舊存土米一萬零三百十二石二斗三升除耗外應解制錢二千四百六十七千七百三十七文應舊存土豆二千一百零七石七斗七升除耗外應解庫平紋銀三百八十二兩六錢一分六釐

嘉慶五年以後至二十二年歲底止應存暨新領共土米七千八百四十七石三斗七升九合

五勺除耗外應解制錢三千零五十一千五百  
六十文除解過制錢一千零七十九千八百七  
十三文外淨欠制錢一千九百七十一千六百  
八十七文應存土豆六百零九石四斗八升三  
合除耗外應解庫平紋銀一百二十一兩五錢  
六分一釐通共未解土米制錢四千四百三十  
九千四百二十四文未解土豆庫平紋銀五百  
零四兩一錢七分七釐謹將五年以後歷任各  
員分賠數目開後

前任正指揮陳理盛 李宗聞 謝天樛 朱

衍昶四員每員分賠制錢一千一百九千八百五十六文庫平紋銀一百二十六兩四分五釐  
東城副廠米豆積欠數目

查嘉慶五年以前應舊存土米九千八百五十四石四斗除歷任解過外尙存七千二百十九石三升六合四勺除耗外應解制錢二千一百九十五千五百三十一文應舊存土豆一千九百十六石八斗除歷任解過外尙存一千三百二十二石六斗三升四合四勺除耗外應解庫平紋銀一百七十一兩七錢五分

嘉慶五年以後至二十二年歲底止除解過外  
尚有未解制錢一百一十二千五百四十一文  
通共未解土米制錢三千三百零八千七十二  
文未解土豆庫平紋銀一百七十一兩七錢五  
分謹將五年以後歷任各員分賠數目開後  
前任副指揮張瑞雲 劉寶箴 喬集祥 蕭  
炤 張希忠 周連 繆其泰七員每員分賠  
制錢三百二十九千七百二十五文庫平紋銀  
二十四兩五錢三分六釐



補授川東道謝

恩摺子

奏爲恭謝

天恩叩請

聖訓事嘉慶二十四年閏四月二十五日內閣奉

上諭四川川東道員缺著陶澍補授欽此竊臣楚南

下士知識庸愚由嘉慶七年進士改庶吉士授

職編修充

國史館纂修典試四川分校會闈十九年改江南  
道御史擢戶科給事中游歷吏科掌印給事中

送奉

恩命巡視南漕巡視中城巡視東城二十三年四月  
俸滿截取奉

旨記名以繁缺道員用涓埃未効兢惕方深迺荷  
恩綸補授今職聞

命之下感悚交縈伏念川東爲巴蜀鎖鑰之區道員  
有督率巡查之責臣自惟駑下深懼弗克勝任  
惟有籲求

聖訓敬謹遵循庶於地方一切公務得以認真辦理  
仰酬

高厚鴻慈於萬一所有微臣感激下忱謹繕摺恭謝

天恩伏祈

皇上睿鑒

訓示謹

奏

嘉慶二十四年閏四月二十六日具奏

履歷夾單

陶澍湖南長沙府安化縣人年四十二歲由嘉慶七年壬戌科進士改庶吉士散館授職編修充

國史館纂修官十五年奉

命充庚午科四川鄉試副考官十九年三月改江南  
道監察御史旋充甲戌科會試同考官十一月  
奉

命巡視中城二十年四月轉掌陝西道監察御史蒙  
恩擢戶科給事中九月奉

命巡視淮安漕務二十一年八月奉

命充丙子科順天鄉試內監試官十一月  
殊筆圈出接查儲濟倉奉

旨補授吏科掌印給事中二十二年三月奉

命充丁丑科會試內監試官二十三年四月奉

旨稽查緞疋庫事務是月科俸報滿截取引

見奉

旨交部記名以繁缺道員用八月充戊寅科順天鄉

試巡牆官十月奉

命巡視東城二十四年閏四月二十五日內閣奉

上諭四川川東道員缺著陶澍補授欽此